

GUITS NE PXEEL PABL LO ZHA GALAS

¡Diuzh to grëse to!

¹ Naa nac Pabl, tib zha ne pxeel Dios nonee Xtiidz Ndzon me lo miech. Led miechd bzoo naa, led miechd pxeel naa, sinque Jesús pxeel naa, me ni Dios Pxoz me, men ne bleeban me.

² Laa naa rxel tib guits rii ziaad lo to zigne no to nëz Galás i, nac to zha ne ngab lo Jesús; rquiaabdiuzh naa to, ni scagaa grë zha rii laa zho rxeel bdiuzh lo to. ³ Dios men ne nac Pxoz ne, ni Jesús men ndzon ne rnabey, me nac men ne tsoxco grë zhizhgab to, zeena peet tsienied guic to.

⁴ Jesús bdeed xquielmban bdiizh me xtol ne, psilaa me no lo grëtaa guielntseeb ne no lo guidzliu rii, laaw been me zigne gocladzse Dios men ne nac Pxoz me. ⁵ ¡Gotsaa dziuunnon ne Dios sca, ni gdziind dze ne csaan ne dziuunnon ne me! Sca rieguiala.

⁶ Rzee zdoo naa gon ne gardle gac nroob dze ga, laa to bzozitle lo Xtiidz Ndzon Dios, men ne bredz to pcaania me to, porne nquialadz Jesús to. Wseed ne rliladz to niina, masaque rzac to na mincogaa csilaa to lo dol. ⁷ Per guientraa stib wseed ne gon csilaa ne lo dol. Mine naca zha ne biadseed to i, lega rquidiese zho to, racladz zho ctsëe zho mine nac Xtiidz Ndzon Jesús.

⁸ Grëse zha ne guiaadnie stiblo wseed mine pseete no to, ni gnë zho lëe miñ co csilaa to lo dol; zha ne sca gun, miech ndziibdeeble ga nac zho.

Tel chotaa sca gun, niicle tel naazhala, tib anjl ne quietgaa gbaaw, ible zdzibdee Dios zho. ⁹ Bnele naaw lo to, ni na laaw rneque naa stib: Tel cho zha ne guiadseed to stiblo wseed miñe pseete no to, ni gnë zho lëë miñ co csilaa to lo dol, ible zdzibdee Dios zho.

¹⁰ Nana gon ne znu rne naa, no to guiaab parne guiañziiu naa lo miech gane znu rne naa; per golgacnañ ganle, quiaguibd naa guiañziiu naa lo miech, sinque laa naa noxco gun naa miñe rnabey Dios. ¹¹ Sac telne lel ncuaane gleynie miech noxco naa, nlid dzigo xtsiin Jesùs ga noyun naa!

Jesús pxeeł Pabl gnee Pabl Xtiidz me

¹¹ Bets, bzian, golgacnañ sca ganle: Wseed ne nac Xtiidz Ndzon Jesùs, miñe bialseed naa to, led guicd miech biaba. ¹² Paat biad naa nseed miech naaw, sinque Jesúszhal bneedza lo naa.

¹³ Led nañle to ganle, zha nactaa grë miñe ben naa zeeñe bii no naa lo zhiwseed zha Israel; ptsidil naa grë miech ne no xnëz Jesùs, blëënie naa zho, pquianal naa nloožh naa zho. ¹⁴ Bzhoob diidz ne naa nac zha ne pseedraa lo grë menladz naa, zha ne tipse biagrëë naa scuel; naa nac zha ne neer lo zho, sac naa run grëse miñe rnabey zhiwseed zha Israel, ni naa rioxcoraa run grëse miñe been grë pxozgol no. Sca nagon goc naa lo zha Israel.

¹⁵ Ible güeynied guic naa, antes ne gal naa laa Dios bzooblolle naa gunbey naa Xpëëd me; laa me bleextsole naa, niapse porne nquialadz me naa. Zeene bdzin dze co ¹⁶ laa me blu me lo naa, bzo me naa ga naa zaatne ndxie grë miech ne nacdraa zha Israel, gaseed naa zho Xtiidz me miñe glu zha

laa zho lo dol. Zeeñe blozh gon naa Xpëëd me, biad naa niaguib naa ne goon dieñ cho nseed naa, ¹⁷ ni niicle biadgaa naa Jerusalén, nianabdiidz naa lo grë zha ne pxeelle me nonee Xtiidz me; sinque laa naa bia nëz Arab, wbirele naa nëz co, dzigoraa bdziin naa Damasc stib.

¹⁸ Gocle tsoñ iza dzigoraa bia naa Jerusalén, hor coraa beeñbey naa Pedr; blëz naa lo me ga tsiiñ ngbidz. ¹⁹ Gaque beeñbey naa Jacob bets Jesús, laa grëraa zha ne pxeel Jesús noyun xtsiin me, ni tib zho gonđ naa. ²⁰ Dios zobwi gañle diidzli nac grë miñe rne naa nu, led lega rned naaw.

²¹ Zeeñe brie naa ga, laa naa bia nëz Siria ni nëz Cilis. ²² Grë zha Judé zha ne nole xnëz Jesús, gard gunbey zho naa len dze co. ²³ Diidz ronse zho rnee zla zha ne nacgrë zho: “Men ne scataa pquianal ne, yele me noseed miech Xtiidz Dios, ni glo scataa goclacz me nitlo mew.” ²⁴ Dzigo rley zho, rdeed zho xquizh lo Dios ne yele naa rliladz Jesús.

2

Rcaania zho Pabl

¹ Zeeñe blozh tsienda iza, dzigo laa naa biire bia Jerusalén stib, bio no grop no Bernabé, ni bionie no Tit. ² Laa naa bia, sac ib Dios blu lo naa ne no ga naa. Dzigo ga pcaalsa no grë no zha ne zo rnabey lo grë zha ne no xnëz Jesús ga, bzodiidz naa lo zho zha noseed naa grë zha ne nacd zha Israel Diidz Ndzon ne rlu lo zho zha laa zho lo dol, ni naa zeeña guien zho gañle ne nli rquiin dziin ne beñle naa, ni miñe quiayungaa naa. ³ Ni nligaa bley zho bin zhow.

Niicle ne led zha Israeld nac Tit, per bnabeyd zho niopaa Tit bey ne rio grë zha Israel. ⁴ Per lo zha ne zioobgza no ga, lad co brieequia bla zha ne bnab nio Tit bey co, per choot pquiaadiagd xtiidz zho. Nac diidz ye zho rliladz Jesús, per nlida; ib blud zho cho nac zho, ngueets bzëëb zho lad no biadleets zho dieñ zha mban no, niina ne Jesúsle rnabey no, rnabeydraa ley no. Gocladz zho nquiaadiag no xtiidz zho, biire ndziuun no miñe rnabey ley. ⁵ Per ni palal bdeete no diidz niac miñe rnee zho, laa no racladz guiaaŋnie to Xtiidz Ndzon Jesús miñe rlu zha laa miech lo dol, sac miñ co nac diidzli.

⁶ Grë zha non ne zo rnabey lo grë zha ne no xnëz Jesús ga (zha non guiab ne, per ndion ne ganle grëse ne tibaque nac ne nëz lo Dios) ⁷⁻⁸ ib peet blisquid zho lo naa, niicle peet pseetragaa zho naa. Sinque laa zho gocnaŋ ganle ne ib Dios bzoo naa gun naa xtsiin me, gaseed naa grë zha ne nacd zha Israel guieñ zho zha laa zho lo dol; zigne bzoque me Pedr noseed Pedr zha Israel. Dios men ne bzo Pedr quiasseed Pedr zha Israel, lëéque me bzo naa quiasseed naa grë zha ne nacd zha Israel.

⁹ Gacxe waa, zig nac Pedr, Jacob, Juan, zha ne zo rnabey lo grë zha ne rliladz Jesús ga, laa zho bien ne ible naa bgaa guielnzaac rii, bneedz Dios dziin rii lo naa. Dzigo rley zho haxta bzheñ zho nia no grop no Bernabé, laa no biaan diidz ne zha tsieseед zha Israel, laa no guioseed grë zha ne nacd zha Israel. ¹⁰ Lëëse miñe pso zho diidz lo no, dzioxco no dziuun no xyudar grë zha ne guien pe yquiin; ni nligaa ib nonguiel miñ co ni laaw noyoxco naa.

Ractox Pablo Pedr

¹¹ Laa zeeñe biaad Pedr Antioquí, dzigo ga nli laa naa goctox lo Pedr, sac ncuaañe ndzinlidraa quiayuñ Pedr. ¹² Glo, grëse zha ne nacd zha Israel zha ne rliladzle Jesú, rzënie Pedr zho, tipse rbenie Pedr zho zeeñe laa zho row; ni blozh ga, zeeñe laa bla zha ne pxeel Jacob bdziñ ga, pasëraa Pedr sca tipse niownie zho, laa Pedr bzoxit lo zho. Rdzieb Pedr zha ne bdziñ ga, sac lëë zha co racladz, grëse zha zit ne rzëeb xnëz Jesú ib none tso zho bey ne rio zha Israel. ¹³ Grë zha Israel ne nole xnëz Jesú ga, yeque zho laa zho gocnie Pedr lo xtseb Pedr ga, haxta ye Bernabé wbig lo zho. ¹⁴ Nacne zeeñe goñ naa sca zienaldraa zho zigne nacpaa wseed ne ziaadnie Xtiidz Dios, squi ndxie grëse zha ne rcaalsa ga goctox naa lo Pedr, rep naa: “Luugase name niicle ne zha Israel luu, ni mband luu zigne nac zhiwseed zha Israel, ¿pe nac dzigo ne racladz luu gnabey luu grë zha ne nacd zha Israel, gban zho zigne nac zhiwseed zha Israel?”

Zha rlaa miech lo dol

¹⁵ Golquaadiaga gañle, tel no desde gol no zha Israel nac no, nacd no zigne nac grëraa miech ngoopdol ne nac stib nacion; ible pseed no grë miñe nac xley zha Israel. ¹⁶ Sañgue niina laa no ndion gañle, niicle mazdraa gun miech mine nac ley grieelod guiaanwen zho lo Dios, sinque zha ne dib zdoo gliladz Jesú, zha co nac zha ne guiaanwen lo me. Gacxe waa, ye no laa no bliladz Jesú dib zdoo no, zeeña guiaanwen no lo Dios; ni laa no guiaanwen lo me porne dib zdoo no rliladz no Jesú, nacda porne dziuñ no miñe nac ley. Sac

gon niicle zha ne tsoxcoraa gun zho grë miñe nac ley, grieelod guiaañwen zho lo Dios.

¹⁷ Nana ne laa no wbig lo Jesús parne guiaañwen no lo Dios, no zha ne rzac dol ga. Masaque rzac zho xtol no ga rdziuñctal no porne rliladz no Jesús, per, ¡led scada gon! ¹⁸ Mazd dol ga gun naa, telne rlozhle rseed naa miech rne naa lo zho ne led leyd nac miñe csilaa ne lo dol, ni lozh ga naaque no lozhd tsoxco gun grë miñe nac ley. ¹⁹ Sac tel naa, ib brieelod niuñ naa grë miñe rnabey ley, ni zha ne rguiits ley gon ib none guet zho; gane niina masaque rrieequia laa naa gutle. Niina ne laa Jesús gut por grë xtol naa, rrieequia ye naa gutnie me ga, zeena grieelo gun naa miñe rnabey Dios. ²⁰ Led naadraa nu znu mban, Jesúsle nu mbannie naa, ni guielmban ne mban naa niina, lëë miñ rii bneedz Dios lo naa porne rliladz naa Xpëëd me, men ne rquia zdoo naa, men ne bleeladz xquielmban ga beet zho me bdiizh me xtol naa. ²¹ Nana, telne niaca miñe nli zrieeleo guiaañwen ne lo Dios porne gun ne miñe nac ley, zhlëse ga dzigo biaadguet Jesús. Golgacnañ sca ganle, Jesússe nac men ne csañwen ne lo Dios, gacxe waa nonguielda ga csañ ne me tiblad, ni pa lotaa ga pquia zdoo Dios ne.

3

Jesús none gliladz miech

¹ ¡Nadzpaa nxen to nac to zha Galás! ¿Pe goc to, cho biaadgungüet guic to squi rac to? Pe led zeeñe biadseed no to, wen wen gocnan to cho nac Jesús, ni zha nacne sca beet miech me lo cruz. ² Zhal to golcobey dien, ¿pe ne been to grë miñe nac xley zha

Israel, laa to bgaa guielbiini chen Espíritu Sant, te ne bliladz to Xtiidz Diosa ye? ³ Pa lotaa gon rdzin lo xquie_nxen to i, conque laa to gon_{le} gan_{le} ne niapse por guielbiini chen Espíritu Sant laa to psilo mban tib guielmban cub, ni na na_{na}que to tsienal to ley. ⁴ Pe nlipaa rnee to, ¿pe lega scase nazho gon to grë guielnë ne pteed miech to, zee_ne psilo bliladz to Xtiidz Jesùs? ⁵ ¡Golzhixcuua guic to! Golguien gan_{le}, laa Dios bneedz zhiEspíritu me lo to, ni laa me noyun grë milagr lo to, per nacda porne run to mi_ne rnabey ley, sinque porne dib zdoo to rliladz to Xtiidz mew, mi_ne biadseed no to.

⁶ Zig Abraham, porne dib zdoo me bliladz me xtiidz Dios mi_ne rëb Dios lo me, gane pcaania Dios me zig tib zha ne peet xtold. ⁷ Golgacnan sca gan_{le}, grëse miech ne dib zdoo gliladz Xtiidz Dios, grëse zha co laa Dios ycaania zho zig xpëédpa Abraham. ⁸ Ni mi_ne nodzian ne niina, ib lo Xtiidzle Dios zhobneew, zee_ne bnee me ne grëse miech ne nacd zha Israel, silaa me zho tel_{ne} dib zdoo zho gliladz zho me. Lëe min co ga bnee me zee_ne znu rëb me lo Abraham: “Grëse miech ne ndxie dibdoo lo guidzliu, zha ne dib zdoo gliladz naa zigne rliladz luu naa, zu_nlay naa zho.” ⁹ Gane grëse zha ne dib zdoo rliladz Jesùs, run_lay me zho zigne beenlayaque me Abraham, zee_ne laa Abraham bliladz me dib zdoo Abraham.

¹⁰ Sangue zha ne rnalo ley ne lëëw csilaa zho, laa zho noyac ndziibdeele ga, sac lo Xtiidz Dios no tib zaatne rnee: “Ndziibdee grë zha ne grieelod gu_n grëse zigne na_c ley.” ¡Ni tsod zha ne gon grieelo gu_n grëse mi_ne rnabey ley! ¹¹ Gase naganle rlu tsod tib zha ne grieelo guiaa_nwen lo Dios por gu_n

zho miñe nac ley; ni laaw zhobneeque lo Xtiidz Dios zaatne rnee: “Zha ne guiañwen lo Dios, laa zho guiañwen porne dib zdoo zho gliladz zho me; ni zha co ygaa tib guielmban ndzon.” ¹² Led yed ley rnab dien cho dib zdoo gliladz; sinque rneew: “Zha ne racladz gban, none gun zho grëse miñe rnabey ley.”

¹³ Miñ co nagon, grëse ne nac ne miech laa ne biabdee, sac brieelod mban ne zigne nac ley. Per niina, laa Jesús biaadsilaa ne lo grëtaa dee co, masaque lëë grë dee ne nac ne ga bi me zeeñe sca pquia me lo cruz; zigne zhobneeque lo Xtiidz Dios, zaatne rnee: “Miech ndziibdee ga nac grëse zha ne ret rquiangaa zho tib lo yag.” ¹⁴ Ni por miñe sca bded Jesús ga, miñ co niina grëse miech ne nacd zha Israel, zac ygaa zho grëse guielnzaac ne bzeet Dios lo Abraham ga; ni niicle tib tibgaa zha ne ngab lo mew, scaania zho Espíritu Sant, Espíritu ne rëb me cxeel me lo grë zha ne dib zdoo gliladz me.

Zha ne nlipaa nac xpëëd Abraham

¹⁵ Bets, bzian, laa naa gzet ncuañe rac lo guidzliu rii. Nanle to ganle, zeeñe laa chop miech run tib trat, rquia miñe rnee zho ga lo guits ni rquia lë zho lo guits co grop zho; zeeñe laa lë zho pquiasa ga, ni tib zho gacdraa ctsëë trat co. ¹⁶ Nana gotsaa gwi ne ganle zha been Dios: Psan me xtiidz me lo Abraham, ni tib lo men ne grieequia lo xtii Abraham. Raquiete nzian zho, rëbd me: “grë zha xtii Abraham”, sinque tibaque men ne bzeet me, ni lëë men co ga nac Jesús.

¹⁷ Znu nagon nac miñe quiane naa lo to nu: Tib trat ga been Dios grop me Abraham, zeeñe

rëb me scaania me grëse zha ne dib zdoo gliladz me; ni ible laa xtiidz co me biaan zig tib trat ne quia lë me lo. Miñ co nagon, grieelod ctsëë ley trat co; zig nac ley, blozhle tap gayoo galptsii iz biaan xtiidz co me zeeñe laa ley biaad. ¹⁸ Nana, telne por gun ne miñe rnabey ley, laa ne ygaa grë guielnzaac ne bzeet Dios lo zhitrat me gdeed me por tib men ne greeequia lo xtii Abraham; ¿pazhe dzigo rquiin trat co? Sac lo trat co gon raquiet ne por tib men ne greeequia lo xtii Abraham, laa me gneedz guielnzaac co lo ne.

¹⁹ Nana gnë to: “¿Pa dzigo rquiin ley ne laa ley biaan, ni tel nole trat co glo?” Laaw biaan gon zeeña glu ganle zha nac miech, ib rond zho miñe rnabey Dios zho, laaw been dziin laga bdzin dze ne laa men ne brieequia lo xtii Abraham ga biaad, men ne bzeet Dios ga zeeñe psan me xtiidz me lo Abraham. Ni tel ley, dze ne pcaania zha Israela tib xanjl Dios pxeel me bdeeda lo Moisés, dzigo Moisésle psaña lo menguidz Israel. ²⁰ Sañgue dze ne been Dios trat co grop me Abraham ne laa me csilaa miech lo dol, pxeeld me cho tib miech, cho tib anjlgaa niaadnie xtiidz me; sinque mezhal biadneew lo Abraham.

¿Pa rquiin ley?

²¹⁻²² Nana gnë to: “¿Zig gocladz dzigo lëë nsiooglo xley Moisés lo trat ne been Dios ga?” ¡Led scada! Sac grieelod ygaa ne guielmban ndzon ne gdziñd dze lozh ga, telne gnalo ne ley; ib grieelod ley csanwena ne nëz lo Dios. Telne niaca miñe nrielo ley nsilaaw miech lo dol, nod pe nacne dzigo nxeel Dios Xpëed me, biaad me biadbee me

miech ladzna dol (sac rnee lo Xtiidz Dios masaque ngadoo miech lo dol). Jesússe goŋ zrielo csilaa miech lo dol, totsaque dib zdoo zho gnalo zho me, mese zrielo gdeed guielmban ndzon co lo zho.

²³ Zeeŋe gard guiaad Jesús ga, laa ley co pquiin pquianapa ne zigne rquianap wxtis zha ne nioogyu, laga bdziŋ dze ne laa me biaad. ²⁴ Zig tib ngudziaan ne riaaŋnie mëëdwin, sca pquiin ley co lo ne, pseeda ne zha gban ne, ni gacnaŋ ne cho nac Jesús, men ne csilaa ne lo dol zeeŋe dib zdoo ne gliladz ne me. ²⁵ Sangue niina ne laa Jesús biaadle, led ley codraa gnabey ne, ni niicle rquiindragaa pe cseeda ne. ²⁶ Gacxe waa, tel to xpëëdle Dios nac to porne dib zdoo to rliladz to Jesús, ²⁷ ni grëse zha ne brobnisle porne no zho xnëz Jesús, laa zho rlu gaŋle ne Jesúslle nacnie zho, ni laa zho zienal gban zho zig racladz me. ²⁸ Miŋcocxe nagoŋ waa, grëse ne tibaque nac ne niina, guienđraa ne goon cho nac zha Israel, cho nacgaa zha zit; dien cho nac ngundziin, cho nacgaa zha ne rnabey; goon dien cho nonraa pe mguiw te wnaaw ye; sac grëse zha ne nacniele Jesús, tibaque nac zho grë zho. ²⁹ Ga nagon, telne ngable to lo Jesús, dzigosi nli zha xtii Abraham nac to, ni zgaa to grë guielnzaac ne bzeet Dios zeeŋe psaŋ me xtiidz me lo Abraham.

4

Zha ne nac xpëëd Dios

¹ Golgonaa gaŋle, nligaa tib mëëdwin lëë, niicle guiaaŋnie win ncuaaŋe rap pxoz win, per lega nacse win zig tib ngundziin win ne ruŋ xtsiŋ pxoz win. Niicle chen win grë ncuaaŋ co, per grieelod

win gnabey wina. ² Laa win riaañ ladznia zha ne rañ win, zha ne rseed win dien pe nac ncuaañe gun win, laga gdziñ dze ne laa win zacle ycaania ncuaañe psañ pxoz win.

³ Scadaa nagoñ bzhiaac ne glo zeeñe gard guiaad Jesús, rríeequia masaque ngadoo ne lo grë ley co, ni lo grëraa ncuaañe rac lo guidzliu rii. ⁴ Laa zeeñe bdziñ dze ne laa Dios pxeel Xpëëd me Jesús lo guidzliu (tib wnaa bded por xniaa me, bzoob me diidz been me grëse zigne rnabey xley zha Israel), ⁵ laa me biaadsilaa ne, biadbee me ne ladznia ley co, bdiizh me grë xtol ne, zeeña ycaania Dios ne gac ne mëëd lo Dios. ⁶ Ni parne glu gañle ne nli xpëëdle Dios nac ne, pxeel Dios zhiEspíritu Xpëëd me blëz zdoo ne; gacxe waa niina laa ne rieñ rnee ne lo me: “¡Papá yeen!” Espíritu co rnee ne Pxoz ne nac me.

⁷ Ga nagon, led yedraa niina nac ne zig cholze cho ngundziin, sinque xpëëdle Dios nac ne, ible ye ne ygaa grë guielhzaac ne rap Dios.

Rnee Pabl rnabeydraa ley

⁸ Bets, bzian, golsoladz gañle, zeeñe bii gard gunbey to meñ ne nacpaa Dios, masaque rríeequia ngadoo to lo ncuaañe nac zhimdio to hor co, rdib rdzag to run to grë miñe rzac to rdziladz grë mdio co. ⁹ Nana, laa to runbeyle Dios, mazd gni naa ganle ledaa Dios runbeyle to, epe nac dzigo racladz to gbiire tsiegañ to, tsiequiitsgzhib to lo grë mdio co, gbiire guiab to ladznia grë ncuaañe paat rquiind co, gnabeya to? ¹⁰ Rquia to gon run to grë lni, dien pa mëë ndzonraa, dien pa dze nac dze ndaraa, pa iz nac iz ne ndaraa, dien pa dze zac pe gow to, pa

dzeegaa gacda. ¹¹ ¡Rdziebnie naa to gon! ¡Pe nlipaa zhłeſe bialſeed naa to, ne squi laa to racladz csaan miñe bialne naa lo to!

¹² Bets, bzian, laa naa rnab lo to golban zigne mban naa, tel naa niicle ne zha Israel nac naa per zanaldraa naa miñe nac xley zha Israel. Ngadoodraa naa lo ley, gane rne naa: Golban zigne mban naa. Ni guiabde to togo bod nend no pe falt ne been to lo naa. ¹³ Led rsoladz to ganle, rzacnë naa len dze ne psilo pseed naa to zha laa to lo dol; miñ co nacne nzianlaa dze blëz naa lo to i. ¹⁴ Niicle ne sca rzacnë naa, gondze to naa; laa ne mbix zdoo to nian to xquielguidz naa, znu pquia zdoo to naa, rley to blëzlo to naa pale cho xanjl Dios o Jesúsgaa, tel niaca miñe mezhal niaadseed to. ¹⁵ ¡Ne nlipagaa rleydox to len dze co! Tel niaca miñe niac mbee to bziaalo to, zootle zig mbee tow ngad tow lo naa. ¿Yo grë guielbley co na? ¿Yo ne scataa rleynie to naa len dze co? ¹⁶ Nana, pe rëb to rlëe naa lo to ne znu rne naa miñe nacpaa diidzli. ¡Lëda gon!

¹⁷ Golquiaadiaga ganle, grë zha ne gon squi zi-adseed to i niina, nli laa zho noxco to per zhaa ncuaaŋe no guic zho. Laa zho racladz tebaa zha guiaaŋladz to naa, csaan to grë miñe bialſeed naa to, zeeña gbig to lo zho. ¹⁸ Rtsidild naa pe nacne cho gacnie to, totsaque zha ne nli nquialadz tow. Zig nac naa tibaque noxco naa to, led loxaque zeeñe zodse naa lo to i. ¹⁹ ¡Xin, ne nlipagaa gon rdednë naa ran naa squi rac to! Masaque nac guielnë rii lo naa niina, zig tib yoob ne rquia grë meñ wnaa ne gap mëed. Ni lëe nole naa guielnë rii nu nagon, haxta gdziŋ dze ne gaŋ naa laa to wbiire

wbig lo Jesús stib. ²⁰ Tebaa niaca miñe grieelo guialzhaal naa lo to i niina, zeeña gañ naa zha no to, dzigo dien zha gnegaa naa lo to; per na ne znu zit zo naa, nañd naa dieñ pe nacraa ncuaane noyuñ to.

²¹ Zha ne racladz gnabey xley zha Israel zho, racladz naa gnë zho dien, ¿pe ib rieñd zho zha zhobnee lo guits ne ziaad Xtiidz Dios ²² zaatne raquiet xingan Abraham? Rneew: Chop xingan Abraham, tib mëed co gop wnaa ne nac ngundziin lidz me, laa stib mëed gop wnaa ne nacpaa tsieel me. ²³ Xpëed wnaa ne nac ngundziin ga, laa win goc mëed zig grëraa xpëed miech; sangue mëed ne gop tsieel me ga, laa win gol porne ib Dios rëb ne laa me yquianie win.

²⁴ Lo grop wnaa co, tibga me rlu ganle zha nac grop trat ne been Dios: Miñe bzhaac Agar, ga rlu ganle zha nac trat ne been Dios guic gui Sinaí. Grëse zha ne zienal trat co, nac zho zig goc xpëed Agar, ladzna trat co no zho. ²⁵ Gzoob ne Agar nac Gui Sinaí, gui ne riaañ nëz Arab; me nac guiedz Jerusalén ne ndxie leñ dze rii, sac tel grë meñguedz Jerusalén, masaque ngundziin nac zho lo ley. ²⁶ Sangue wnaa ne gocpaa tsieel Abraham ga, rrieequia me nac Jerusalén ne no gbaa, zaatne ngab grë zha ne no xnëz Jesús, sac led yedraa grë zha co ngadoo lo ley; ye ne ngab ga, ni gzoob ne lëë xniaa ne ga nac wnaa co. ²⁷ Lëë Jerusalén co ga raquiet lo Xtiidz Dios, zaatne znu rnée:
Luu, ne nac luu wnaa ne brieelod niap mëed, bley niina;
nguieel goc, nguiedz broptsie lo guiebley qui,
luu ne bdziñd dze niacnan luu zha nac yoob mëed.

Sac gon̄ ndalraa xpëëd wnaa ne brieelod niap
mëëd,
lëdle grë xpëëd wnaa ne gop mëëd.

²⁸ Bets, bzian, golgacnaŋ sca gaŋle, laa ne nacle niina zig Isaac, xpëëd tsieelpaa Abraham, wnaa ne gacd yquianie mëëd ga; sac tel̄ Isaac, ib Dios psaŋ diidz ne laa Isaac gac mëëd lo Abraham. ²⁹ Ni zigne sca blëenie xpëëd wnaa nguṇdziin co Isaac, mëëd ne Dioszhal psaŋ diidz gal ga; scasaque niina, no zha ne rlëë raŋ zho zionald ne miñe rnabey ley, sinque laa ne zional dib zdoo ne rliladz ne Jesús. ³⁰ Ni nana, led lo Xtiidzaque Dios zhobnee gaŋle zha rëb Dios lo Abraham, rëb me: “Wnaa ne nac nguṇdziin lo luu i, bzonëz me grop xpëëd me, nonguield ne ye mëëd qui guiaannie ncuaane csan̄ luu lo xpëëd tsieelluu.” ³¹ Gacxe nagon̄ waa, tel̄ ne nacd ne zig xpëëd wnaa nguṇdziin co, sinque laa ne nac zig xpëëd tsieelpaa Abraham.

5

Dziits golso

¹ Peet lo ngadooodraa ne niina, sac gon̄ laa Jesús biaadsilaale ne, sinque to none dziits so zeeŋa ygadoode to lo xley zha Israel. ² Naa nac Pabl, ni naazhal rne lo to nu. Golgonā sca gaŋle, telne laa to gdeed diidz tso to xbey zha Israel, nacniedraa to Jesús ga dzigo. ³ Ni laaw gneque naa lo to nu stib, grëse zha bgui ne rio bey co, ib none guŋ zho grëse zigne rnabey ley co. ⁴ Zha ne rzac por guŋ zho grë miñe rnabey xley zha Israel, miñ co laa Dios csilaa zho lo dol, gacnaŋ zho gaŋle, lel̄ nozozit zho lo Jesús ga; ygaad zho guiel̄nzaac ne ygaa zha

ne gnalo Jesús. ⁵ Saŋgue tel no, ndionpaa no silaa Dios no lo dol, sacne dib zdoo no rliladz no Jesús ni nacnie Espíritu Sant no. ⁶ Sac zha ne nli nole xnéz Jesús, peet liaadz nodraa zho bey ne rio zha Israel. Miňe noxcoraa zho nac ne dib zdoo zho gliladz zho Jesús, ni scagaa grieelo gleynie zho samiech zho.

⁷ ¡Ese tow nli! ¿Pex goc to waa? Zaacsse name rac to zeeňe psilo to bliladz to miňe nac diidzli. ¿Cho pquiił to ne nédraa to tsienal tow? ⁸ Miňe squi nonie guic to i niina, led zhiwseete Dios i, meň ne bredz to grieet to ladznia ley. ⁹ Golguien sca, adel ye to sac zig rëb diidz ne rnee: “Niipaxe ncobi waa ruňcsibe ncob guietxtil.” ¹⁰ Per naŋpaa naa, ible meň ndzon ne rnabey ne meň co gacnie to, zeeňa csaande to miňe nac diidzli; ni zha ne squi racladz gungüet to, tel chotaa nac zho ib tedsod siaabzi Dios zho.

¹¹ Bets, saŋgue naa tel niaca miňe nli ye naa quianabey tso grë zha ne rliladz Jesús xbey zha Israel zig quianee zha qui, bod goonzhe ni ct-sidildraa zha Israel naa dzigo, gléëdraa zho zig rléëtaa zho niina zeeňe ron zho rne naa zha nacne biaadguet Jesús lo cruz. ¹² Zha ne squi ziaadnabey tsopaa to bey ne rio zha bgui nëz Israel, itebaa mazd ladaque zho yga zho, niicxe gdib nacse zho waa cueniaal zho, led tsod zho noyuňneed zho to! ¹³ Bets, golguien gaňle ne ygadoodraaxe to lo ley waa, miň co nacne biaadsilaa Jesús to. Per guiaabde to togo ne laa me psilaale to, laa to gun ncuaanę guiaabtaa guic to. Guňscade to, sinque tib tib to golleynie samiech to, iňe golguň ncuaanę rquiin grë zha ne nacgrë to; ¹⁴ sac niina totsaque gban to zigne rnabey Dios nu: “Bleynie samiech

luu zigne rleynieque luu luu”; lëële grë miñe nac ley ga gun to. ¹⁵ Per tel laa ne gleynie to zha ne nacgrë to, lel dil no to, zig run grë ma ne lëëque ma noquiaalaysa, lëëque ma noyowlsa; dzigo lëëque to gnitlo to ga. ¡Guñscade to!

Zha ne lega mbanse

¹⁶ Gacxe, laa naa rnab lo to: Goltxoxco golban zigne racladz Espíritu Sant, ni me gacnien to; led tsode to dien zha gun to grë ncuaane ndzinlid ne racladz xcuerp to. ¹⁷ Sac gon grëse ncuaan co, rleynied Espíritu Santa. Laa xcuerp ne run ncuaane racladzd Espíritu Sant, ni ncuaane racladzgaa Espíritu Sant nëd xcuerp ne gac miñ co. Guñde to miñe racladz xcuerp to sca. ¹⁸ Telne gban to zigne rnabey Espíritu Sant, dzigosi nodraa pe nacne ygadoo to lo xley zha Israel.

¹⁹ Ni miech ne sca run grë ncuaane ndzinlid, ib paat ngueetsd zho:

rionie zho zha ne led tsieeld zho,
ruñ zho grë ncuaane ndzinlid ne racladztaa
xcuerp zho,

²⁰ riegan zho grë mdio,
rnab zho pe sac samiech zho,
rlëënie zho samiech zho,
rdilnie zho samiech zho,
rzac zho adel cho glale tsieel zho,
rnadse pew laa zho rlëële,

runctil zho miech,
rguib zho rtso miech,
rbeextso zho dien cho zha ne gacnie zho,

²¹ në rac zdoo zho ran zho ncuaane quianie stib
miech,

rzudz zho,
rcaalsa zho zaatne loxaque rowcho zho, ni run
zho grë guielyozh.

Grë ncuaan co run zho ni grëragaa ncuaane
ndzinlid ne sca nac. Laa naa rbire rso diidz lo
to, gunde to grë ncuaan co; sac goñ grëse miech
ngoopdol ne sca rban, grieelod gdzin zho zaatne
rnabey Dios.

[22](#) Sangue zha ne zienal miñe racladz Espíritu
Sant, znu nac zha co:

rleynie zho samiech zho,
tibaque nguieel rac zho,
peet dzeb nonied guic zho,
rxecew zho, rieedniobd zho,
niowse rnee zho lo samiech zho,
niapse ncuaan wen run zho lo samiech zho,
run zho miñe rnee zho guñ zho,
[23](#) miech ndooladz nac zho,
zha rnabey xcuerp zho.

Ni telne gban ne zigne nac grëse miñ rii, ni
tib ley noguiitsd ne ga. [24](#) Grëse miech ne nli
xnëzle Jesús no, zieniedraa guic zho guñ zho grë
ncuaane ndzinlid ne bzoobladz zho padzeela, grë
ncuaane ndzinlid ne racladznë xcuerp zho, sac
rien zho paat rquiind ncuaan co lo zho. [25](#) Gacxe
nagon waa, telne nli mbannie ne guielmban ne
rneedz Espíritu Sant, golgotsaa dzion ne miñe rn-
abey me. [26](#) Dzigosi gacniatsdraa ne lo samiech ne,
tsienaldraa ne dien cho glaaraa guiaan, tso ne në
gac zdoo ne gañ ne grë ncuaane rap zho, ncuaane
racgaa zho.

6*None gacnie ne samiech ne*

¹ Bets, bzian, telne gañ to laa cho tib zha ne nacgrë to noyun pe tib dol, dzigo to ne nac to zha ne nlipaa zienal miñe rnabey Espíritu Sant, to golnee lo zho. Diidz wen, diidz ndooladz golco zdoo zho gbiire xixcuua guic zho; ni scagaa tib tib to none nsin so to, sac gon adel nenda yeque to sca sac. ² Zeeñe ran to zha ne mban noded, golgun xyudar zho, golchoobladz zdoo zho, sac gon sca rnabey Jesús gban miech.

³ Tel zha ne rzac zha non nac zho, ni laa zho peet nond zho; lëeque zha noguitnie zho ga. ⁴ Tib tib to, wen wen golguien dien pe quiayun to, telne ncuaane ndzinliw iñe golley, per tsode to glëë zdoo to gañ to miñe run stib zho. ⁵ Sac tib tib ne, psose Dios ne pe nac xtsiiñ me miñe gun ne.

⁶ Grë zha ne noseed Xtiidz Dios, ib none ncuaane rgaataa lo zho gdeed zhow yquiin zha ne noluw lo zho.

⁷ Tsienie wguite guic to sca, sac gon led yed Dios guiab ne quitnie ne. Tib tib ne, tel pe nac miñe run ne mincoque ctsire me lo ne. ⁸ Zha ne run grë ncuaane ndzinlid, lëë miñe cueequia zho ga laa zho nitlo. Laa zha ne gun grë miñe rnabey Espíritu Sant, lëë miñe ygaa zho ga nac tib guielmban ndzon ne gdziñd dze lozh. ⁹ Gacxe nagon waa, tibaque gotsaa dzioxco ne dziuuñ ne ncuaane ndzinli, ncuaane rquiin, guieete ne; sac telne sca tibaque dzioxco new, zeeñe gal dze co laa ne ygaa miñe guioguijal ne. ¹⁰ Zeeñe gdeedtaaw diidz sca, golgotsaa dzioxco ne dziuuñ ne xyudar grëse samiech ne, ni nana zeeñe zha ne noque

xnëz Dios nac zho, mazdraa rieguial dziuuñ ne xyudar zho.

Rso Pabl diidz

¹¹ ¡Golwi gañle, naazhal pquia nu! ¡Golwi gañle mbee mbee nac letr rii pquia naa rso naa diidz lo to! ¹² Grë zha ne goñ squi racladz tsopaa to bey ne rio zha Israel, laa zho runa zeeña glëenied miech zho, zigne rlëenie zho grë zha ne rseed miech ne ib laa Jesús gut lo cruz, psilaa me grëse miech lo dol.

¹³ Nana, niicxe grë zha ne nole bey co, rundaque zho grë miñe rnabey ley; sinque laa zha qui nagon quiaguib tebaa gdeed to diidz tso to bey, zeeña sca lozhd guiat s zho ne zha bnabey to bio to bey. ¹⁴ Sangue tel naa, ib quiaguibd naa ne dien zha gaciati naa, sinque laa naa quiaguib gacnañ miech gañle zha nac ne laa Jesús gut lo cruz. Sac tel naa, por grë miñe bded Jesús ga, grëtaa ncuaañe no lo guidzliu laaw psan naa tib lad; ni niicle naagaa, sca rzac grë miech guidzliu naa. ¹⁵ Grëse zha ne ygab xnëz Jesús, nacda ne dien cho no bey ne rio zha Israel, chogaa noda; sinque miñe non nacne ctsëe Dios lo xquielmban zho.

¹⁶ Grëse to ne nac to zha ne zienal diidz ne rso naa nu, Dios yquia zdoo to, ni me gacnięt to ctsebd grë zhgab to; niicle tow ni niicle grëragaa zha ne ngable lo mew.

¹⁷ Bets, bzian, golgacnañ sca gañle, ib racladz-draa naa goñ pe yquiaaqi gbiire gaquiet miñe bnele naa lo to nu; sac tel naa, grëtaa mdel ne no xcuerp naa nu, lëëlew nac bey ne rlu gañle ne nli lo Jesús ngab naa, ni xtsiñ me noyuñ naa.

18 Jesúš men̄ ndzon ne rnabey ne, me tsoxco grë zhizhgab to. Sca gaca.

Pabl

**Diidz ne rdeed guielmban
New Testament in Zapotec, Mixtepec
(MX:zpm:Zapotec, Mixtepec)**

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files
dated 29 Jan 2022
5317ca58-7555-5e4c-a420-e1e9210e2df2